

# Ilinniarnertuunngorniartarneq pillugu Inatsisartut inatsisaata allangortinneqarnera pillugu Inatsisartut inatsisaat (Ukiut 3-t sinnerlugit sivirususilimmik ilinniarfigerusutamut akuerisaanissamut ilassutitut piumasaqaatit)

## § 1

Ilinniarnertuunngorniartarneq pillugu Inatsisartut inatsisaat, Inatsisartut inatsisaat pillugu Namminersorlutik Oqartussat nalunaarutaat nr. 10, 29. september 2021-meersoq naapertorlugu uku allangortinneqarput:

**1.** § 9-p kingorna ilanngunneqassaaq:

” § 9 a. Ukiut 3-t sinnerlugit sivirususilimmik ilinniarfigerusutamut akuerisaanissamut piumasaqaatit ilassutitut piumasaqaatit §§ 8-mi 9-milu taaneqartut saniatigut ilassutitut piumasaqaatissat pillugit Naalakkersuisut malittarisassaliorinnaapput.”

**2.** § 10, imm. 2-mi, oqaaseqatigiit aappaattut ilanngunneqassaaq:

”Ilinniartoq 3. G naammasseerelugu ilinniarnertuunngorniartarneq sammivimmik ukiuni 4-ni sivirususilimmik, rektorilu isumaqatigiinneq malillugu ukiut 2-t angullugit ilinniakkaminik unitsitsigallartup, 4. G-p aallartinnerani ilinniarnertuunngorniarnini nangissinnaavaa ilinniarnertuunngorniartarneq ilinniartup ilinniarfigeriigaani imaluunniit ilinniarnertuunngorniartarneq allami.”

**3.** § 15, imm. 1-3, imatut oqaasertalerneqassapput:

” Ilinniagaq 1. semesterisut aqqissugaassaaq, ilinniartunit tamanit ataatsimoorunneqartut, tamatumalu kingorna ilinniarnermi immikkut sammiveqarluni ingerlatsinertut, ilinniartunit ataasiakkaanit ingerlatsinernit ilinniarnertuunngorniartarneq neqeroortugalugillu pilersitaasa akornannit toqqarneqartumik, tak. § 29. Sammivilimmik ilinniagaqarneq 2.-6. semesterini ingerlanneqartarpoq. Ukiuni 4-ni sammivilimmik ilinniagaqarneq 2.-8. semesterini ingerlanneqartarpoq.

*Imm. 2.* Semesterit 1, 3, 5 aamma 7 ukiup ilinniarfusup aallartinneraniit 31. decemberimut ingerlasarput.

Semesterit 2, 4, 6 aamma 8 1. januarimiit ukiup ilinniarfusup naaneranut ingerlasarput.

*Imm. 3.* 1.-2. semesterit 1. G-mik taaneqartarput, 3.-4. semesterit 2. G-mik taaneqartarput, 5.-6. semesterit 3. G-mik taaneqartarput, aamma 7.-8. semesterit 4. G-mik taaneqartarlutik.”

4. § 53 imm. 1-ip kingorna immikkoortutut nutaatut ilanngunneqassaaq:

” Imm. 2. Ukiut 3-t sinnerlugit sammivilimmik ilinniagaqartut eqqarsaatigalugit ilinniartup 3. G-miit 4. G-mut ikaarsaariarnissaa rektorip aammattaaq itigartitsissutigisinnaavaa, tak. imm. 1.”

Imm. 2 tamatuma kingorna imm. 3-nngussaaq.

## § 2

Inatsisartut inatsisaat ulloq 1. januar 2025 atuutilissaaq.

*Namminersorlutik Oqartussat, ulloq 25. novembari 2024*

**Múte Bourup Egede (atsior.)**

Naalakkersuisut Siulittaasuat

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut